



**KEMENTERIAN PERLADANGAN DAN KOMODITI  
MALAYSIA**

---

**SIARAN MEDIA**

**PAMERAN KOMODITI KEMENTERIAN PERLADANGAN DAN  
KOMODITI (KPK) MEMPERKASAKAN SEKTOR PERLADANGAN  
NEGARA MELALUI PENGETAHUAN DAN INOVASI**

**KUALA LUMPUR, 23 OGOS 2024** – Kementerian Perladangan dan Komoditi (KPK) telah mengadakan pameran komoditi di Pusat Dagangan Dunia Kuala Lumpur selama empat hari, bermula dari 21 hingga 24 Ogos 2024. Pameran ini bertujuan untuk memperkasa pengetahuan dan kemahiran pekebun kecil serta pemain industri berkaitan komoditi utama negara, iaitu getah dan kelapa sawit dengan memberikan pendedahan kepada para pengunjung mengenai teknik terkini, inovasi, serta amalan terbaik dalam sektor perladangan, khususnya berkaitan komoditi getah dan kelapa sawit.

Pelbagai jenis produk hasil keluaran daripada komoditi berasaskan getah dan kelapa sawit telah diperkenalkan kepada orang ramai sepanjang pameran ini. Ianya bertujuan untuk meningkatkan kesedaran mengenai kelebihan dan manfaat penggunaannya dalam kehidupan seharian dan sektor industri. Di samping itu, pameran ini juga berfungsi sebagai platform untuk para pemain industri dan pengusaha berkongsi pengetahuan serta menjalin kerjasama strategik yang mampu meningkatkan daya saing serta inovasi dalam sektor perladangan. KPK turut menyediakan ruang untuk penyampaian maklumat mengenai inisiatif BUDI Agri-Komoditi, selain membuka kaunter pendaftaran untuk pekebun kecil yang ingin mendaftar permohonan. Sehingga 19 Ogos 2024, sebanyak 18,690 permohonan BUDI Agri-Komoditi telah diluluskan, sementara 7,704 rayuan telah diterima. KPK akan terus komited dalam mengadakan program 'outreach' di seluruh Semenanjung, dengan lokasi seterusnya di Chenor, Pahang, dan Baling, Kedah.

Pelbagai aktiviti menarik telah diadakan untuk menarik minat pengunjung. Antaranya termasuk sesi penerangan mengenai inisiatif BUDI Agri-Komoditi kepada pekebun kecil dan pengunjung yang hadir. Selain itu, Lembaga Minyak Sawit Malaysia (MPOB) juga telah menyediakan khidmat nasihat berkenaan Amalan Pertanian Baik (GAP) serta memaklumkan mengenai pelbagai bantuan dan skim pembiayaan tanam semula sawit yang ditawarkan kepada pekebun kecil. MPOB juga telah mengadakan pameran korporat yang menonjolkan peranan mereka dalam industri sawit serta menganjurkan aktiviti seperti teka berat tandan buah sawit dan cabaran minum minyak sawit merah.

Lembaga Getah Malaysia (LGM) pula telah membuka kaunter penerangan dan permohonan Permit Autoriti Transaksi Getah (PAT-G) yang merupakan permit percuma untuk pekebun kecil getah yang menguruskan ladang tidak melebihi 40 hektar. Selain itu, LGM juga telah memperkenalkan program rintis model baharu Insentif Pengeluaran Lateks (IPL+) yang menggabungkan mekanisme pembelian terus oleh pekebun kecil kepada kilang pemproses, serta pelbagai insentif tunai, insentif galakan, dan teknologi baharu seperti RRIMeter dan RRIMniaga. LGM juga telah memberikan penerangan mengenai Insentif Pengeluaran Getah (IPG), satu langkah domestik kerajaan untuk memastikan kebajikan pekebun kecil getah terjamin ketika kejatuhan harga, sekaligus memastikan pengeluaran getah domestik berterusan. LGM juga telah mempamerkan produk unik seperti RRIM Color™, cat berasaskan getah asli yang sesuai digunakan dalam seni visual, dan teknologi rangsangan pokok getah RRIMHydrobest, yang direka untuk meningkatkan produktiviti tanaman getah.

Pameran Komoditi ini dijangka memberikan impak positif kepada para pengunjung, termasuk meningkatkan pengetahuan dan kemahiran mereka dalam pengurusan tanaman serta pengeluaran produk. Selain itu, pameran ini telah memperkenalkan pelbagai produk inovatif berasaskan getah dan kelapa sawit yang dapat memberikan peluang pasaran baru kepada pengusaha dan pemain industri. Program ini juga telah meningkatkan kesedaran orang ramai dan pemain industri mengenai kelebihan dan manfaat produk berasaskan komoditi tempatan, sekaligus memperbaiki imej industri dan menarik minat pelabur.

**KEMENTERIAN PERLADANGAN DAN KOMODITI**

**23 OGOS 2024**